

رسوم متحركة

ايهاب همام

روايه

المنهج الحديث



رسوم مُتحرّكة

إيهاب همّام

رواية



إن الآراء الواردة في هذا المصنف لا تعبر بالضرورة عن آراء وتوجهات الناشر وإنما تعبر عن رأي المؤلف فقط..

يمنع نشر أو نسخ أو ترجمة هذا المصنف أو جزء منه بأي وسيلة تصويرية أو إلكترونية أو ميكانيكية بما فيها التسجيل الفوتوغرافي و التسجيل على أشرطة أو أقراص مضغوطة أو أي وسيلة نشر أخرى بما فيها المعلومات واسترجاعها بدون إذن كتابي من المؤلف طبقاً لقانون حماية الملكية الفكرية رقم ٨٢ لسنة ٢٠٠٢ والقوانين المماثلة لها.

الإهداء

إلى ...

تلك التي شجعتني ووثقت فيّ دائماً، أهديتها لتلك التي
منحتني الحياة بطولها أجول بين طياتها كما تجول
وريقات الخريف بين نسيم الجو العليل أهديتها لكِ

♥ أمي ♥

وأهدي سطورها لقلبك الجميل. أحبك

إيهاب همام

مقدمة

فى قصص الرعب يتجلى الجو قاتما ذا لون ازرق يتشكل امامنا ككيان معادى نرفضه ونرفض تماما العيش فيه بل وربما نرفض الحديث عنه اما باعتباره شيئا منفرا غير مقبول واما باعتباره مرتعا خصبا للخيال والتخاريف وقد يجده البعض مشوقا مثيرا للاهتمام وانا من الفريق الثالث وعلى طول عمرى كنت أسمع وقليل ما كنت اشاهد واستعشر قيمة الحدث وجمال السياق فالبطل انسان كلما كان عاديا كلما كان اكثر جاذبية وملائمة لمشهد الرعب - لمشهد التلاقى بين قوى غير مادية تنتمى لغابات مظلمة صامته وبين من يعيش فى تراب الهواء ويجرى لمادياته وهذه الهوة السحيقة بين الطرفين هى ما يخلق جاذبية لا تصدق فأنت عندما ترى البطل مصعوقا غير قادر على الحركة امام الشبح غير ان ترى بطلا آخر ا يقف بقوة وتحدى امامه.

فالمشهد الاول اقوى تأثيرا واكثر امتاعا لأنك هو هذا
البطل بالفعل وبقليل من الخيال تصبح خائفا مرعوبا من
مجرد احتمال ان تكون مكانه داخل الكادر.

المؤلف

إيهاب همام

الفصل الاول

أنا عاصم، عمري ٢٥ سنة، من صغري و أنا بحب القراءة بطريقة غير طبيعية، لدرجة إنني كنت بقرأ كتب الأدب و أنا عندي عشرة سنوات، صحيح لم اكن افهم منها شيء، لكن كان علي انتهى من قراءتها، و كبرت و كانت معرفتي بالعالم مقتصرة على الكتب ، كان العالم مرسوم في دماغي بواسطة رسام اسمه الكتاب، كان هو اللي يصور لي الدنيا حوالي عاملة ازاى، عايش في منطقة نائية جداً، لكن مليانة بيوت! بشكل غير طبيعي، و كلنا عارفين بعض في المكان عايش لوحدي بعد وفاة جدي! اللي رباني من صغيري، بقيت ألي موجودين معايا في المنطقة، الأمر اللي خلاني مضطر إنني أشتغل عشان أكسب قوتي اليومي! فاضطريت أسيب التعليم و أدور على شغلانة، قررت إن فرصتي الوحيدة!! المكتبة اللي جمبنا، أظن إن كلكم هتستغربوا، بعض الموظفين القدام في البنوك، و الشركات بيقبضوا مرتب مش بيكفيهم لآخر الشهر! فما بالك إنت هتشتغل في مكتبة! اللي تلاقيها شبه مهجورة اصلاً! لأن لحسن حظي،

المكتبة دي خاصة، قرر جماعة من المستثمرين يعملوا مكتبة مخصوصة لكل كتاب أو حتى ورقة! نادرة، زي كتب أسرار الحروب و كتب اكتشافات العلماء السرية، و ملفات الاستخبارات، بس برضوا! مين هيجي يضيع وقته مع الكتب، ناس كثير!!! ناس كثير جداً و بعكس توقعي، بدأوا يزوروا المكتبة و بكثرة و ازدحام ... فطلبت المكتبة عمال يشتغلوا فيها، أنا قلت أحسن من مفيش ... فلما روحت هناك، دخلت المكتبة لقيتها مكان فخم بصراحة، و مرتب و زي المكتبات اللي في الدول الأجنبية كدا، كنت بنظر للكتب و عيني بتلمع! لأنني لو اشتغلت هناك، هيبقى عندي كنز ملوش لا أول و لا آخر! كان في واحد عمال ينظروا عليا بنظرات غريبة، كأنه شايف واحد مريب قدامه! بس الرجل معذور صراحة، أنا كنت هريل على نفسي من كتر الكتب! لما نظرت لي، من البدلة و الشكل، عرفت إنه المدير بتاع المكتبة، فرحت له على طول ..

- ازاى حضرتك يا فندم، أنا كنت جاي أقدم على وظيفة هنا في المكتبة

- أيوة يا ابني أنا مش

لسا هيكمل، لقيت واحد تاني لابس بدلة بيقول لي، تحت أمرك، أي خدمة؟

ليتضح إنني كنت بكلم واحد من المستثمرين بتوع المكتبة
ببلاش، أقل كتاب عشان تقرأه، تدفع فيه الشيء الفلاني..
فطبعاً كان لازم يطمئن على فلوسه المستقبلية.

أنا طبعاً لما عرفت إنني كنت بكلم واحد من مؤسسين
المكتبة! قلت لنفسي أنا كذا إترفدت قبل ما أتعين!

لقيت الراجل دا بيقول للمدير:

المستثمر: بقول لك إيه؟ سييني معاه شوية كدا، و
هبعتهولك تاني.

المدير: أمر سعادتك ...

لقيته دخلني معاه في حجرة فخمة جداً، مكتب، و كنب، و
كراسي عمري ما تخيلت إنني هشوفها اصلاً، وقعدنا وبدأ
يكلمني:

- أنا لاحظت إنك عينك على الكتب، كنت بتتظر لها
كأنك وجدت ثروة، بس خليني أقول لك، بيع الكتب مش
بيجيب تمنة! فخليها مكانها أحسن! و أنا هديك حلوة بدل
الكتب!

- مش فاهم حضرتك ، هو حضرتك بتلمح لإيه؟!

- يعني ما انتاش عارف؟! يابني دي مش مجوهرات و لا
فلوس! دي شوية ورق! إعتقهم! سيب الناس تتعلم ..

- إيه دا! هو حضرتك بتقول إني هسرقها؟! حضرتك
فاهم غلط خالص!!!

و بدأت أشرح له من أول ما دخلت المكتبة! لحد ما بدأنا
نتكلم!

الراجل نظرته إتغيرت و لقيته ابتهج من كلامي! و نادى
على المدير:

المستثمر: يا مفتاح، مفتاح
المدير: أيوه سعادتك.

المستثمر: من بكر الصبح الأستاذ يبدأ يتدرب على
شغلانته الجديدة، أنا خلاص عينته أمين المكتبة

المدير: بس يا فندم..

المستثمر: بس إيه؟! خلاص أنا قررت، أنا لازم أمشي
عشان ورايا التزامات تانية

لقيت المدير دا وشه قلقان شوية! سألته هو في حاجة؟!
خير ...

قال لي، إن في بنت اصلاً متعينة أمينة للمكتبة! و هو
مش عارف يعمل إيه!

قررت إنني هسيب الشغلانه، و أشتغل عامل أو أي شيء
تاني! بصراحة هم محتاجين موظفين كتير، و الشغل
على كتير زي ما بيقولوا .. لكن المدير قلق لا المستثمر
اللي أنا عرفت إن اسمه شامل، يعمل مشكلة معاه، فقرر
المدير يخلي للمكتبة أمينين!

رجعت البيت و أنا سعيد إنني حصلت على وظيفة بأجر
خيالي، و المطلوب! إنني أقرأ كتب! أظن إن دي أحلى
حاجة في حياتي حتى الآن

بدأت أول يوم في العمل، و كان نص اليوم تقريباً عن
طريقة التعامل مع القراء اللي هم الزباين، و أعمل إيه و
معملش إيه، و الذي منه، و قعدت في مكان مشترك أنا و
اسراء .. اسراء دي هي أمينة المكتبة اللي إتعينت قبلي،
و هي الشيء الوحيد اللي كرهني في المكتبة، بسبب
تصرف واحد ليها! إنها كانت بتضحك، طب ما كل
الناس بتضحك! عادي يعني، لكن هي! دي هي حتى
مكش بتضحك | عارفين انتوا الشخص اللي بيحط إيد
على فمه عشان يداري ضحكة كبيرة، و طويلة! و يطلع

أصوات كأنه عايز يضحك بس كاتم! هي كانت كدا! و طول اليوم! و دائماً تبصلي و هي بتعمل كدا! و حتى أما حد من القراء يقرب ناحيتها، بتضحك بهستيرية! بس بصراحة هي شاطرة أوي في شغلها! و دا أكيد اللي خلاها تبقى موجودة هنا رغم تصرفها الغريب دا!

بس أنا الوضع ما عجابنيش! فقررت إنني أشوف مكان تاني أقعد فيه! ما لقتش غير مكتب صغير! و موجود في زاوية في المكتبة! عارفين انتوا المكان اللي تحسوا إنه عليه شبك العنكبوت من كتر ما هو قديم! هي ما كانتش قديمة! لكن المكان يوحي لك إنك قاعد في حنة مهجورة! بس أحسن! هدوء تام! و كل الزوار تقريباً بيكونوا مع زمرد! أما أنا ، منشغل مع الكتب!!!

يوم ورا الثاني، و إسبوعين ورا ثلاثة! الموضوع عجبني! و كانت الحياة حلوة و أكثر و الحمد لله..

فى يوم كنت ماشي ناحية مكتبي ،، و إتعبت و وقعت! بس اللي إتعبت فيه، كان كتاب غريبة! المفروض إنني كنت أشوط الكتاب! دا كإنه مثبتت في الأرض! لا دا هو فعلاً مثبتت في الأرض ..

حاولت أشيله، و أشوطه برجلي يجي ستة مرات! مفيش
فايدة، لحد ما لقيت الناس بتنظر لي ،، فقررت إني
أجرب آخر

تجربه، و وفعلا مسكته بإيدي بكل قوة، و شديته، لقيته
طلع في إيدي مرة واحدة! كإن! كإن في حد كان ماسكه
و مش راضي يديهولي، و فجأة سابه ... خدت الكتاب و
إتسحبت، و على مكتبي علطول عشان أتفحصه!

الكتاب كان لونه بني، كان مغلف بشيء زي الفرو، ناعم
جداً، كان كله فرو! بس دا مش كتاب من المكتبة لأن كل
كتب المكتبة مغلفة بجلدة عادية زي باقي الكتب اللي في
الدنيا، دا غير إن عليها باركود كمان! و أول و آخر
صفحة عليها ختم المكتبة الخاص، و في علامة مائية في
كل صفحات كتب المكتبة! لكن الكتاب دا، كان كله كلام،
مفيش أي بيانات أو حاجة تثبت إنه تبع المكتبة! أول
صفحة كان مكتوب فيها " مرحباً " بس مش من اليمين
للشمال! كانت مكتوبة بالطول! مش بالعرض زي في
الكتب و الكراسات! و بدأت أقلب الصفحات كان الغلاف
الفرو، بعدها صفحة مرحباً، بعدها صفحة بيضاء، بعدها
صفحة مليانة كتابة، بدأت أقرأها.

هنيئاً لك، أنت المختار! سيكافئك الموساق الأعظم بكنوز عظيمة، لكن عليك بالتضحية اولاً، أحضر لنا الدماء الحارة، أحضر لنا الماء البارد، أحضر لنا الشعر، الكثير من الشعر، و شعرة من عذراء .. حررنا و لك ما تريد في الدنيا، سيكون لك الخدم الكثير، لكن يجب أن نعود، نحن دائماً نعود ...

قريت و أنا مش فاهم أي حاجة، أحرر مين، و مين اللي هيرجعوا دول! أنا مش فاهم حاجة ... قلبت الصفحة لقيت كلام مكتوب، بس بخط تاني، الظاهر إن حد كان كاتب حاجة عن نفسه.

" أنجزت مهمتي الأخيرة، و أنقذت حفيدتي الوحيدة زينب، و أخذها الشاب الطيب ليرعاها، لكن الوضع مؤقت، سأعود من هناك لحفيدتي لكي أكمل رعايتها، سيخرجني أحدهم بمقابل أن أمنحه الكنوز و الثراء، لكن ما لا يعرف

لقيت باقي الصفحة مقطوعة، قلبت صفحة تانية، لقيت رسمة بالقلم الرصاص و جواها كلمات، رسمة غريبة متوصفتش، مربع جواه دواير، و نجوم، و طالع منه مثلثات، شكل غريب جداً، و لاقيت مكتوب:

مراسم و طرق التحضير!

عرفت المقصود ساعتها!

قلبي بدأ يدق بسرعة شديدة! لقيت كتاب يعادل المكتبة
دي كلها! تسخير مخلوق ممكن يمنحك السعادة كلها في
الدنيا ، ليه لا؟! أنا هبدأ أول ما أروح البيت
كملت قراءة!

لكي تحرر الموسيقى من سجنه، و محبسه! عليك بالآتي
ادخل بغرفة مغلقة! و قم بملئها بالدخان، فل تحرق أي
شيء داخلها ليتصاعد دخان كثير! ثم إبدأ بإحضار الدم
الإنسي الدافئ، و اسكبه على جسدك! بعدها أحضر
الشعر! و ضعه على شكل دائره كبيرة، ثم ضع شعره
من شعر فتاة عذراء داخل الدائرة، و إسكب عليها
قطرات من ماء بارد، بعدها قم بتجميع الشعر نحو شعرة
العذراء، و قم بحرقه كله!

ثم ردد، " ومس، ومس، موساق! نستدعيك من غياب
الجحيم لتعود لنا مجدداً! أرسل لنا من قوتك التي لا
حصر لها! إحفر الأرض، و شق السماء، و سنقدم نحن
الطاعة، بخ، الوحاء، ٢٢٢، مرحوم ... بعد ما قرئت!

مخفتش! لكن فكرت! هجيب دا كله منين؟! الشعر،
هيكون شعري! طب و الدم دا كله! و إزاي هكبة على
نفسي، و شعر العذراء منين?!

قررت إنني الأول، هجيب شعرة من البنبت اللي شغالة
معايا! أول ما اسراء مشيت، قلبت المكتب بتاعها! لحد ما
لقيت شعرة بني على الكرسي بتاعها! خدتها و روحت
البيت! بدأت أجرح نفسي لحد ما كان الدم مقدار كباية! ،
لكن أنا إتقرفت من موضوع أكبه على نفسي، فطرطشت
على نفسي من الدم لحد ما خلص! و بدأت

أرص شعري اللي قصيته على هيئة دائرة! و حطيت
خصلة شعر زمردي النص! رشيت قطرتين مية! بعدها
جمعت الشعر كله، و حرقتة! لكن محصلش أي

حاجة! أيقنت إن الكتاب دا مزحة من حد، و مسكته
عشان أقطعه!!!!

وقع من إيدي! و اتفتح على صفحة! كان مكتوب فيها
الآتي:

" شاكرين، شاكرين، شاكرين جزيل الشكر، أيها
المستحضر، نحن حمايتك، من كل من يتجرأ على إذائك

المال، و السلطان، و البأس ذا العزة، و لدينا مزيد ... "

بس اللي وقع قلبي في رجلي! إن الصفحة اللي كان
مكتوب فيها الكلام دا! كانت فاضية!!!!!!

أحلف لكم بإيه إنها كانت صفحة بيضة!! عرفت ساعتها
إن الكتاب دا وراه حاجة كبيرة!

خرجت من البيت فوراً ناحية المكتبة عشان أرجع
الكتاب لمكانة! على الأرض! أنا مش عايزة خلاص،

و أنا في طريقي للمكتبة! كانت الظلمة حالكة جداً! مكنش
فيه غير ضوء القمر هو اللي نورلي طريقي! لأن
المكتبة بتقفل أبوابها عند غروب الشمس!

ملقتش أي حد حوالين المكتبة! و لا حتى جمعه حارس
الأمن! فقررت إنني أدخلها بأي طريقة! و أنا متجهة
للباب الخلفي بتاعها! لقيت حاجة غريبة جداً!

لاقيت واحد لابس معطف إسود طويل! مخليه شبه
الغربان في الليل! شعره كان إسود، و ناعم، و خفيف! و
كان متسم بشنب طويل، و دقن منبته، عارفين انتوا
الناس بتوع زمان اللي على أيام الخديوي! هو كان
شبههم بالطبط!

لقيته ببشاور عليا! لا دا ببشاور ع الكتاب اللي في ايدي!
أنا: والله أنا كنت هرجهه، أنا هديه لحضرتك
الراجل:

و بدأت أتقدم نحوه بهدوء شديد! أول ما كان بيني و بينه
حوالي خمسة خطوات، وضعته على الأرض، و جريت،
و شقيت الطريق زي السهم، لكن اللي خلى
قلبي يدق بشكل كان هيخرج من ضلوعي! ، إنه أول ما
وضعته الكتاب، و بدأت أجري نظرت ورايا!
لا لقيت الراجل، و لا لقيت الكتاب ...

ما اهتمتش كثير و رجعت البيت، نمت و صحيت لأول
يوم ليا في حياة جديدة! رحت الحمام عشان أغسل وشي!
لقيت أغرب حاجة ممكن تتوقعوها! ملقنش قط أسود و لا
سمعت أصوات و لا اي شيء!

لكن لقيت شعري زي ما هو! بعد ما كنت قصيته كله
تقريباً، و بدأت أشوف دراعي! ملقنش أثر خدش واحد!
مع إنني مليته جروح! لسا ببص في المرايا، لقيت مكتوب
عليها، لكن مكنش مكتوب عليها بحبر أو لون! ،، دا كأن
حد كحتها بحاجة حادة! كان مكتوب " و لدينا مزيد "

على قد الخوف، و الرهبة من اللي حصل! على قد
الفرحة اللي فرحت بيها! بقى ليا خدم زي ما قال
الكتاب! رححت المكتبة عشان أجهز نفسي عشان أسيبها!
خلاص أنا مش محتاج اي حاجة دلوقتي! لا فلوس و لا
وجع دماغ!

لما دخلت لقيت اتنين بيصرخوا لبعض بصوت عالي
كان منهم المدير! و واحد تاني حواليه حرس و شكله
شيك أوي!

و كان معاهم واحد ثالث كان منظره خايف جداً!! أول ما
نظر لي!

- أهو، هوا دا يا بيه اللي كان عند المكتبة بالليل

المدير: إيه! عاصم! مش معقول! أكيد في سوء تفاهم

صاحب الحرس: إنت بقى " الحرامي " اللي كان جاي
يسرق، الكتب القيمة بتاعتنا! إنت عارف إنت هيجصل
لك إيه، و ساعتها عرفت إنهم خدوا خبر إن كنت عند
المكتبة بالليل! بس و أنا بتكلم معاهم! نظرت على
مكتبي! لقيت الكتاب هناك! إبتسمت إبتسامة عريضة
جداً! و قلت لهم أنا كنت جاي عشان أستقيل اصلاً! هاخذ
حاجتي من على المكتب، و أمشي و مش جاي هنا تاني!

لقيت الراجل إياه اللي شكله شيك أوي دا، بيقول لي إنتا
فاكرها تكية، يالا إنتفضل من هنا بدون مطرود!

بكل غضب، همست: إما وريتك أنا هعصرك!!!!
مبقاش أنا! عرفت فيما بعد إن إسمه رضا، واحد من اللي
أسسوا المكتبة!!

و مشيت و قررت إنني هجيب الكتاب بأي طريقة ثانية
بعدين!

نزلت بعدها للسوق أجيب شوية مستلزمات للبيت! بعدها
رجعت، كانت حوالي الساعة ١٠ بالليل!

رجعت البيت في إنتظار إنني ألاقى الكتاب رجع لي!!!
لكن اللي كان في البيت كان حاجة ثانية خالص!

دخلت البيت و ريحت شوية، بس حاسس إن في حاجة
مش مزبونة! حاجة كدا على غير العادة!

صوت!!! حاجة عمالة تحك، و تعمل صوت!

كان جاي من المطبخ! رحح هناك! و صرخت صرخة
هزت المنطقة كلها!

شفت أرب منظر ممكن حد يشوفه في حياته!

لقيت كروانه كبيرة، مليانة دم على آخرها، و كان بيطلع
منه بخار من كثير سخونته!

و لقيت!!! لقيت

لقيت واحد متعلق بأصفاذ من جلد قفاه! و كان مربوط في
مروحة السقف! والمروحة كانت بتلف لوحدها! و
الراجل دا جسمه! مقدرش أقول عليه حاجة إلا إنه كان
معصور! حد عصره و فرغه من كل السوائل، بقي

مكرمش، و وشه عليه علامات الفزع! عرفت من ملامح
وشه إنه كان رضا! الراجل اللي أنا هددته! بإني
هعصره!!!!!! اللي لاحظته، و خوفني أكثر! شعره كله
كان أبيض، مع إنه كان إسود زي الفحم لما شفته أول
مرة، قبل ما أصرخ صرختي الثانية عشان أهرب، لقيته
بكل بطأ بينظر لي!

عندها بس صرخت، و جريت ناحية باب الشقة، و عندها
بس! النور كله قطع! و بدأت أسمع صوت مرتفع بشكل
جنوني! ناس عمالة تصرخ، و كأنها بتتعذب في الجحيم،
و أنا بدأت أبكى، و أشوف فين باب الخروج بالراحة!
أول ما وضعت إيدي على الباب! كل شيء سكت!

و النور رجع تاني و سمعت بس جملة واحدة! بصوت
مبحوح جداً!

بتقول " طلبت، فننقدنا، حضرت، فحضرنا، ولدينا
..... مزيد "

جريت فوراً من البيت على براء، و الدنيا ظلمة كحل!
بحاول أدور على أي حد، لقيت حد من بعيد، جريت
عليه، كانت بنت!

لكن دي ،، دي! إيه اللي جابها هنا؟!
دي كانت ...

* * * * *

الفصل الثاني

بدأت أجري زي السهم من البيت، مش بفكر غير في الهروب.

لقيت وسط الظلمة الحالكة بنت، اللي أظهرها كان ضوء القمر!

دي إيه اللي جابها هنا؟؟؟؟!!!!

دي اسراء

مسكتها من ذراعها و جريت بها لأبعد مسافة عن البيت، و هي ساكتة، و مستغربة من اللي أنا بعمله

لحد ما بعدنا عن البيت خالص!

اسراء: إيه يابني مالك في إيه؟!

أنا: مفيش مفيش حاجة! النور قطع بس و ...

اسراء: أنا جاية لك في خبر هيفرحك! تقدر ترجع الشغل تاني

أنا: إيه الشغل؟

اسراء: إنت فاكرنى مسمعتش! أنا شفت كل اللي حصل بينك، و بين الأستاذ رضا الله يرحمه!
أنا: إيه!!!!!! إنتي لو قلتى لحد على اللي حصل أقسم بالله إني

اسراء: إنت مسمعتش الحادثة؟!

أنا: هااااا حادثة؟! هااااا؟!

اسراء: حادثة حصلت من بعد ما مشي من المكتبة على طول! السيارة اللي كانت بتوصله، نزلت تحت حاملة بضائع من الضخمة دي اللي طولها ٥٠ متر! ساوت السيارة بالأرض!

- سمعت إنهم أما خرجوا جثته! لقوها اتعصرت، و إتهشمت!

أنا: بقول لك إيه تعالى نرجع البيت عندي! عايز أجيب حاجة من هناك!

اسراء: لكن ماشي

و بدأنا نتمشى ناحية البيت!

لقيت قلقانة، و تعابير وشها تدعو للريبة!

اسراء:

- هوا

-

- هو إنت معاك الكتاب؟ صح!

عيني برزت، و لمعت في وشها أول ما جابت سيرة الكتاب! و سألتها عرفت إزاي بدأت تحكيلي بترتيب، و تلقائية معرفتها بالكتاب دا!

اسراء: أنا قبل ما أشتغل في المكتبة! كانت كل حياتي هم، عارف إنت الناس اللي مبيشوفوش في الدنيا غير الأبيض و الأسود؟ أنا كنت كدا! و كنت متعودة دايماً كل يوم جمعة! أزور والدي الله يرحمه في المقابر! كالعادة قعدت قدام قبر والدي في صمت تام!! لكن اللي أثار دهشتي القبر! لقيت التراب طالع منة حاجة زي المثلث! قربت من المثلث دا، و مسكته! كان لازق بشدة! دا كان حد نبش القبر، و دفن الشيء دا جواه! ناديت على التربى يطلع لي البتاع دا! و طلعه! كان الكتاب!!

أخذته و مشيت على طول عشان أشوف فيه إيه! لقيت كل الصفحات فاضية! لكن الصفحة الأولى هيا اللي فيها المحتوى!

عنوان الصفحة: العودة

" أيها القارئ، بقوة الأحد عشر أمير، بأسرار سيد عرش النار المستوي على الماء، فل تأمر بحضورنا، لنحضر، و نحول حياتك لنعيم لا ينتهي إلا برحيلك عن هذا العالم، أنجز لنا مراسم العودة، معنا الذهب، و الياقوت معنى ما تشتتهي نفس ابن آدم، و لك ما شئت! و لدينا مزيد | اذكرنا في الأرض نذكرك في حضرة البعلزبول، اذكرنا بقوة " كاناطور "، اذكرنا بقوة " ماراسور " اذكرنا بقوة " كالطوال " اذكرنا بقوة الأعظم " موساق ومس " ... "

و بتكمل اسراء ١: و بدأت أنفذ شروط الإستحضار كان الشرط سهل جداً، و غريب جداً! إني أرسم على الحيطه علامة " + " بظفري!

بدأت أحفر العلامة على الحيط بظفري، لحد ما حفرتها! بعكس ما ممكن أي حد يتصور! النور يقطع! أو عفريت يطلع لي! محصلش أي حاجة!

غير إني سمعت صوت حفر، عارفين الصوت اللي بيبقى طالع لما حد يفضل يحك ضوافره في الحيطه! أنا سمعته كان جاي من العلامة اللي رسمتها!

صوت مرعب و مخيف! إنتا متصور إنك لوحدك في
البيت في ذروة الليل! تسمع الحيطه بيخرج منها صوت
حفر بالضوافر! كأن في حد ورا الحيطه!!! الصوت
سكت فجأة!

لكن الفرحة مكملتش! لأن الكتاب إتفتح لوحده! على
صفحة، مكتوبة بالحرق!!!!

يعني في حد حارق أجزاء من الصفحة، و مخليها على
شكل كلمات!

" إكملت الصحوة، والعودة، و بركات منا ستحل عليك،
لعائن السماء هي هدايا الجحيم، فل تكلمي ما بدأت! دع
الظلام يستهلكك، يا إبنة الـ.... "

مقرأتش الباقي لأن الصفحة كانت محروقة من تحت!
فقررت إنني أنام! و نمت فعلاً! محصلش أي حاجة غير
طبيعية! بعكس ما كنت فاكرة حوالين السحر و الجن!
العالم دا هادي جداً! بس الناس هي اللي إديته قدر أكبر
من قدره! صحيت من النوم بعدها، لقيت راجل قاعد في

الأوضة! كان معاه كتاب، و عمال يكتب فيه! دا الكتاب!
اللي أنا لقيته في المقبرة!!!

خلص كتابه، و قفل الكتاب، و بص لي!!!

لقيت ضحكة لو قلت عليها " شيطانية " هكون قلت من
قدرها! ضحكها ميضحكش بيها غير إبليس نفسه!!

و لقيته فتح باب الأوضة و خرج بهدوء!، و الأوضة
كلها فيها سخونة! لأنها بدأت تتحرق!!!!!!

فضلت أصرخ و أحاول إني أقوم من على السرير، لكن
مش قادرة!! غمضت عيني، و إستنيت أما النار تاكنني!

فتحت عيني تاني! عشان أدرك إني كنت بحلم مش أكثر!
و الكتاب موجود في مكانه زي ما هو!

غير إن في صفحة جديدة إتكبت فيه!!!

" لقد فتحت لنا أبواب الخروج من الجحيم، و لك في
الدنيا ما تريدين، فاطلبي، و إمنحي القدسية للموساق
الأعظم، لكن حذاري، فبركاتنا لعائن، و جودنا من أسفل
سافلين "

مفهمتش كل السطر دا! لكن قلت مش مهم!

رددت التعويذة، و طلبت الأمنية! طلبت إني أضحك و
لاابكي! و أسعد و محزنش! و لما طلبت! عرفت معنى
السطر كله! " بركاتنا لعائن "

الطلبات بتكون ملعونة!

عرفت ليه أنا كنت على طول بضحك بدون توقف في
المكتبة؟!

حياتي إتحوالت لجحيم! بقيت كل ما أدخل البيت أول ما
الشمس تغرب! أبدأ أسمع!! أصوات ضحك كثير! ضحك
شيطاني مخيف..

الضحك اللي عشت عمري كله عشان أجربه! إتحول
لأكبر لعنة في حياتي ...

و في ليلة أشهد إنها أسوء ليلة في حياتي كلها! مسكت
الكتاب، و بدأت أشخبط في كل صفحاته! و مسكت
سكينة و بدأت أغرسها جواه! و كنت على يقين تام! إني
بعد اللي عملته دا!

هموت! لكن محصلش أي حاجة! كاني بقطع كراسة
عادية!!! طلعت برة البيت، و عند أقرب صندوق " زباله
"!!! رميت الكتاب، و حرقت الصندوق كله!

ونمت أحلى نومة في حياتي! لأنني أيقنت إني خلصت من
الكابوس!!!

صحيت الصبح على صوت رنة تليفون!

مجهول: الو

اسراء: أيوة، مين معايا؟
مجهول: هو حضرتك تعرفي الحاج عبد الكريم عطا الله
اسراء: أنا أبقى حفيدته! هو ماله!
مجهول: عايزينك تشرفينا في القسم!!!
و رحى القسم اللي قالولي عنوانه! و كلي خوف! طبعاً
عارفين من إيه!!
و بدأت أتكلم مع الضابط!!
الضابط: هو جدك كان لي عداوة شخصية مع حد؟
اسراء: أبدأ هو عطول في حالة!
الضابط: كان من النوع الغني؟ أو كان في حاجة قيمة في
بيته؟
اسراء: بالعكس يا فندم كان غلبان جداً!
الضابط: إكتب عندك يابني!
" و بعد الإستماع لأقوال الشهود، تعالت صرخات من
بيت الضحية " عبد الكريم عطا الله " مما إستدعى
جيران الضحية لإقتحام البيت لتفقد صاحبه! فعثروا على

جثته، مقطعة بألة حادة، التي وجدت في مسرح الجريمة،
و كانت سكين منزلية! و

في اللحظة دي، قلبي إتقبض قبضة كتمت نفسي! لكن
إضطريت إنني أخفي أي مشاعر جوايا! لحد ما أعرف
اللي حصل، بيكمل الضابط و بيقول:

و وجدوا قطعه متناثرة في كل أرجاء الغرفة في حالة
حرق تام!! "

طلبت من الضابط إنني أشوف صور للحادثة! فلقيت من
بينها! صورة لسلاح الجريمة!!

كانت نفس السكينة اللي قطعت، و غرست الكتاب
فيها!!!! لك أن تتصور تسارع دقات قلبي! في النهاية
نفذت الإجراءات، و مشيت من القسم! على قبر جدي!
اللي إتدفن الصبح بدري! بعد ما عجز أطباء الطب
الشرعي عن معرفة أي هوية للقاتل!

رحت هناك قعدت امام قبره، و كنت بضحك كالعادة!!
لحسن الحظ إنني عرفت أكتم ضحكي في القسم!!! في
وسط جلستي! لمحتة!الراجل اللي أنا شفته في الحلم!
جريت عليه!!! لكن كل ما أجري كنت الأقيه بيخفتي!

بيتلاشي!! لحد ما وصلت للمكان اللي كان عنده! و
لقيته!!!

الكتاب!!! ما فيهوش خدش واحد!!!

فتحت صفحاته! كلها بيضاء، عدا الصفحة الأخيرة
بعنوان: آخر العهد

" لقد إكملت مهمتك، طلبت فنفيذنا، و حاربنا فغفونا! و
لم نأخذ منك الكثير، فل ترسلينا لغيرك! حتى يحررنا
مجددآ! لتتابع أعمالنا بين بني آدم "

حطيت الكتاب في البيت! و رحى أول يوم عمل في
المكتبة! و مرت الأيام بعدها لحد ما إنتا حضرت! فكرت
إني أدليك الكتاب! لكن قلت تكتشفه إنتا بنفسك أحسن!!!

صرخت فيها، إنتي إزاي تعملي فيا كدا؟! إنتي عارفة
إنتي إديتيني إيه؟! دا كتاب مستحيل يكون من عالمنا! دا
كتاب الشيطان نفسه!

و

لسا بكمل، لقيتها قالتلي مش عايز تعرف أصل الكتاب
دا؟

قلت لها بتلقائية! أبوة!

اسراء: الكتاب دا هو وصلة بين عالمنا، و العالم
البرزخي! و مش المقصود هنا البرزخ اللي بيبقى عند
الموت! المقصود البرزخ اللي بفيصل الماية العذبة عن
الماية الحلوة!

كتاب ألفه مجموعة من الساحرات الإسكتلنديات في حقبة
القرن السابع عشر! كان كتاب قوته ملهاش حد! كانت
الساحرات بتستخدمه عشان تسحر ملوك و ونبلأ
إسكتلندا قديماً أثناء فترة حرق الساحرات! و كان فيه ١١
قسم! كل قسم مخصوص بشيطان ماردا! فيما بعد قام

أحد كهنة السحر العرب بترجمته! لكنه ترجم قسم واحد
بس! قسم الموساق الأعظم! ماردا من مستشاري إبليس!
بيتكلم بكل لغات العالم! و مفيش ساحر إستخدمه إلا و
إتقتل في الآخر! من الخدم بتوعه!!!

و دا كان آخر طلب ليا قبل ما أديك الكتاب! إنني أعرف
سره!

بدأت أرد عليها، و أنا هعمل إيه دلوقتي!! أنا طلبت
أمنية! و إتحقق

اسراء: عملت إيه؟!

أنا: رضا! أنا السبب في قتله.

اسراء: .. إيه!!

و كملت إحنا لازم نعرف كل شيء عن الكتاب دا! عشان نعرف إزاي نخلص منه للأبد! إنتي اللي أظهرت لي الكتاب! و إنتي اللي هتخلصيني منه! و إلا هستخدمه ضدك

اسراء: إنتا بتتكلم معايا كأني ضربتك على إيدك عشان تستخدمه! إنتا قرريت التحذير في أول الكتاب! و إنتا اللي وافقت على الإستحضار!

لكن أنا عارفة واحد ممكن يخلصنا منه! واحد هو الشخص الوحيد اللي قدر يفلت من اللعنة! أنا: مين؟! مين هو!

اسراء: أنا من فترة قرريت خبر! كان لي تأثير كبير في البلد! أكيد إنتا عارفه، الخبر كان بعنوان!

" أهالي قرية مجهولة يشعلون النار في أنحاء القرية، و العفاريت هي السبب "

بدأت أقرأ الموضوع كله!

" و وفق أقوال شهود عيان، فقد قام أهل القرية بإحراق كل منازلها بدون سبب، و بشكل تلقائي و عشوائي،

حتى مسحت النيران القرية بأكملها! لكن ما أثار الريبة هو وجود منزل واحد خال من أي أثر للحريق! و بعد إقتحام القوات الأمنية لذلك المنزل، لم يجدوا فيه شيء

يذكر إلا مجموعة من الصور لعائلة لم يتم التعرف عليها، و كتاب غير معروف مصدره كان داخل هذا المنزل، وجد في هذا الكتاب صفحات كلها خالية من أي مضمون أو سطور! إلا أنهم وجدوا بإحدى صفحاته جملة مكتوب بها (سنعود، بعد ٥ سنوات) الأمر الذي زاد من القضية تعقيداً و قام فريق التحقيق بالقضية بالتحفظ على الكتاب لفحصه " القرية دي! لازم ...

قلت لاسراء إنها تجهز لأنها هتيجي معايا! لكنها رفضت..

رغم إلحاح طويل مني!!

لكن خلاص، مش مهم ... مش هحتاجها في حاجة، رجعت البيت، لكن كنت بفكر! طول ما أنا ماشي معاها كانت بتبتسم إبتسامة خافتة بهدوء شديد!

رجعت البيت، و جلست امام الكتاب! اتفحصه بهدوء! فتحت صفحة من النص! بس كل الصفحات فاضية!

فضلت أقلب أقلاب، لحد ما لقيت صفحة ممثلة، صفحة في نصها مكتوب بالخط العريض: قرية الملاعين.

" من أشد منا قوة، أحرقنا القرية الخبيثة عن بكرة أبيها، و لكن أنجبنا منها واحداً فقط! مع حفيدتي! لن نعود لتلك القرية، فإن عدنا هلكننا! و هلك من أهلنا "

فهمت! فهمت ماكنتش عايزة تيجي معايا ليه! كانت عايزة تضحي بيا عشان الكتاب يتدمر! و أنا معاه

بكل غضب: أنا هدفك على اللي إنت عملتيه!!!

نمت و صحيت الصبح، إستعداداً لرحلة لجنوب وادي النيل! لقرية لسا معرفش هل هتكون مهجورة! و لا معمورة!

لكن قبل ما أمشي هعدي عليها! اسراء ليه تعمل معايا كدا؟!!

بدأت أخبط على بابها و مردتش لكن! سمعت صوت بكاء من جوة!

بدأت أزرع الباب عشان تسمعني! لكن مفيش فايده!

فقررت إني أكسره! و رزعته برجلي إتفتح!

ملقتش أي حاجة!

الصالة، الحمام، المطبخ! مفيش أي حد جوة! لكن كان في أوضة مقفولة! فضلت أخبط أخبط! لكن مفيش أي إستجابة.

ففتحتها بالراحة!

و لقيت المنظر!!! قبر، داخل الغرفة!!

لقيت كل البلاط اللي في الحجرة متكسر! كله تراب!! و كان في نص الحجرات تراب متراكم على شكل قبر!!

عرفت إن الكتاب إستجاب لكلمتي! لما توعدتها إني "" هدفنها ""!!!

خرجت بكل ما أملك من سرعة من البيت، و قررت إني أتجه فوراً للقريبة!

يوم كامل من المواصلات لحد ما وصلت للقريبة! و دخلتها!

لقيتها مكان هادئ جداً، بنكهة الموت! لسا متفحم زي ما هو! و فاضي تماماً، باختصار ساحة ضخمة، و مهجورة! فد عز تعمقي في الاطلاع على المكان دا! إيد جت على كتفي! نطيت من مكاني، و لقيت شيخ كبير ضحك في وشي.

الشيخ: إيه يا بني مالك، شفت عفريت؟
أنا: لا مؤاخذة يا حاج، بس متوقعتش إن حد يبقى موجود
هنا!

الشيخ: بس متأخذنيش يا ابني في السؤال، هو إنتا إيه
اللي جابك هنا؟

أنا: بدور على واحد، هو الوحيد اللي ممكن يساعدني،
ففكرت إن ممكن حد يساعدني!

الشيخ: يساعدك في إيه؟

فطلعت له الكتاب! ملامح وجهه إتغيرت ١٨٠ درجة! و
قال بصوت خافت "" الراعي ""

أنا: مين الزاهد دا يا حاج!؟

لقيت وجهه الشيخ رجع تاني و الإبتسامة رجعت، و بدأ
يحكي!

الشيخ: الراعي دا هو الوحيد اللي خرج من القرية دي
قبل ما تتفحم بالشكل اللي إنتا شايفة دا! خرج هو و البنات
الملعونة، هي اللي جابت الخراب لينا، منها لله!

أنا: أنا لازم أعرف مكانه يا حاج! ألاقيه فين!!

الشيخ: في مرسى مطروح! إسأل هناك على عيلة علي
الأخضر! مش هتغلب!!!

- و ابقى بلغه سلامي!! الزاهد كان أعز صحابي يا ابني
- و والنبي يا ابني متقلق منامي تاني! إنتا كاتم على
نفسي، و كمان هتكتم على نفس الناس اللي معايا!
و لقيته بيمشى.

أنا: إستنى يا حاج! بس أنا مصحتكش! و إزاي كاتم على
نفسك!؟

الشيخ: الحتة اللي إنتا دايس عليها! أنا راقد تحتها!
و لقيته إختفي!! و لك أن تتخيل ... نزلت على التربة
دي! و حفرت بإيدي فيها!

لحد ما ضفري حك في حاجة صلبة!! حفرت أكثر، لكن
وقفت الحفر! لأنني لقيت جمجمة بني آدم!

جريت من المكان دا، و أنا بصرخ! لحد ما مشيت
خالص من الحتة دي!

و عرفت هروح فين!! أقاصي مرسى مطروح ... عشان
أدور على الراعي.

الفصل الثالث

انتهى الموضوع بموت اسراء! اللي كان هدفها إني أنا
اللي أموت!
لكن العكس حصل! رححت القرية، لكن محصلش زي
اللي كان مكتوب في الكتاب! ممتش
و هي! ماتت! بدأت أفكر هو الكتاب خطط لكل دا؟! مش
عارف، لكن هي تستاهل!! أيوة تستاهل ...
جهزت نفسي للارتحال لمرسى مطروح!!
كانت رحلة طويلة و شاقة جداً
لكن كان في شيء واحد غريب!
في وقت السفر! و أنا بنظر على المسافات قربت كدا
بالضبط!
مرسى مطروح ١٥٠ كم

مرسى مطروح: ٧٠ كم!

قرية الشيطان: ٢٠ كم!!!!!!

لحد الان مش عارف اللي أنا شفته دا كان تهيؤات و لا حقيقي! لكن أنا متأكد إني قرأتها كدا بالنص!!!

بدأت أتوتر لحد ما وصلت! و من مكان لمكان أسأل علي الأخضر! دلة ورا الثانية لحد ما دلوني على مكانة!

و وصلت هناك! وصلت لشبه قصر كبير! دخلت جوا الحوش اللي امام القصر، كان فيه شجرة غريبة كانت شجرة مايلة، و حد مخربشها بضوافة! بس دي مستحيل تكون ضوافر بني آدم، لسا بتلقت حوالية، شفت واحد امامي!

كان راجل شايب جداً! بإبتسامة هادية، و مسالمة! أذن ليا بالدخول! الناس ضايفوني بكل ودية و حفاوة! لكن أول ما جبت سيرة الراعي! باختصار شديد دلوني على مكانه! و طردوني من البيت! لكن بشياكة بمعنى واضح! سألت على العنوان لحد ما وصلت، لقيت زي مش كوخ! عارفين البيوت الصغيرة بتاعت زمان دي! اللي عاملة زي العشش لكن أكبر! لقيت البيت دا! خبطت على الباب، لقيت بنت فتحت! كانت في عمر ال ١٤ أو ال ١٥

و لاحظت حاجة غريبة فيها! عيناها، عيناها اليمين كانت زرقا! لكن الشمال، الشمال كانت حمرا زي الدم! لكن مش حمرا بالمعنى اللي إحنا عارفينه! الشبكية نفسها بتاعت العين هي اللي كان لونها أحمر!

أنا: هو الراعى فين؟

البننت:

..... -

- أخويا مستنيك في البيت! أحسن لك تلحق! عشان مفيش وقت ...

و أديتي ظرف! فتحته!

" أخي في العهود الأحد عشر، عاصم، إذا قرأت رسالتي هذه! فاعلم أنني عندك في دارك! عد ستجدي، و ستجد ما يرضيك فقد إقتربنا جدا!! و خذ معك صاحبة العين الحمراء، لكن حذاري، لا تلمسها سننتظرك ... "

الرسالة من أولها لآخرها! مريية!!! لكن أكثر حاجة إستغربت لها! كلمة " سننتظرك " و فضلت واضع الكلمة دي في حساباتي!!

بدأت أجهز نفسي أنا و البننت دي!

و سافرنا

أنا: هو إنتي أخته؟

البننت:

أنا: طب ممكن أعرف إسمك إيه؟

البننت: زينب

أنا: هو إيه مشكلة عينك؟

البننت: هو إنتا هتقدر ترعاني؟

أنا: أرعاكِ؟ يعني إيه؟!

وصلنا بالسلامة، و بدأنا نتجه ناحية بيتي، توقعاً مني
إني هلاقيه بالداخل...

أثناء عودتي للبيت! قابلني الحاج سعيد! و الحاج سعيد دا
هو إمام المسجد بتاع المنطقة! راجل كدا من كتر طبيته!
بيخليني دايماً أبتسم في وشه بتلقائية!

الشيخ سعيد: إزيك يا عاصم يابني

أنا: الحمد لله يا شيخ سعيد، إزيك إنت

الشيخ سعيد: الحمد لله، هو إنتا كويس يا بني؟ إنتا كويس؟!

أنا: آيوة الحمد لله يا شيخ سعيد، خير هو في حاجة و لا إيه؟

و لقيته بيقول لي، لازم أحكي لك! بس

الشيخ سعيد: ألا؟ هو مين البنت اللي معاك دي؟!،

أنا: دي واحدة قريبتني من بعيد، أبوها لي شوية شغل هيخلصهم هنا! فجابها معاه عشان تتفسح شوية!

الشيخ سعيد: آه، المهم يا بني ابقى تعالا المسجد كمان شوية! عشان نتكلم مع بعض!

كلام الشيخ سعيد قلقني جداً! فقررت إني هودي فاطمة لحد البيت! و أرجع! مع إني متلهف عشان الشوف الزاهد دا!

لكن وديتها و رجعت علطول! من غير حتى ما أسلم عليه! و لا أشوفه!

رحت المسجد، و قعدت مع الشيخ و كان الكلام كالاتي!

الشيخ سعيد: مين اللي عندك ف البيت يا عاصم؟! " بنبرة غضب شديدة جداً "

أنا: بالراحة بس يا شيخ سعيد، هو إيه اللي حصل؟!
الشيخ سعيد: فترة غيابك! أهل المنطقة كلهم قرروا إنك
مش هتعيش في المنطقة دي!
أنا: ليه بس إيه اللي حصل?!

الشيخ سعيد: من أول ما سبت دارك! كل يوم بالليل!
نسمع منها أصوات حفر! كأن حد عمال يحفر جوا
البيت! و ممكن أقسم لك يابني علي اللي شوفناه! ، ،
- شفنا باب دارك بيطلع منه دم! كأن الشقة من جوا
غرقانة دم!! كأن في خزان دم انفجر جوا الدار! و لما
نحاول ندخل، نحس بحرارة شديدة! كأن البيت بيتحرق
من جوا!

- و أما نرجع تاني يوم! نلاقي البيت رجع زي ما كان!
لا في دم، و لا حرارة، لكن كنا بنلاقي راجل بيطلع
الصبح يرش مايه بجردل حوالين البيت، و يدخل تاني!
جربنا نكلمه!

- لكن مفيش رد! مبيفتحش الباب!

- أنا آسف يابني، بس إحنا كلنا هنقتحم البيت دا النهاردة
بربطة المعلم!

أنا: دا مستحيل يحصل، أنا هفهمك كل حاجة يا شيخ سعيد!

ولقيت وجهه تغير ١٨٠ درجة! و قالي لا تفهمني و لا أفهمك! و حسيت بأقوى ضربة على دماغي! جاية من ورايا

أيقنت وقتها! إنهم مش هياخدوا رأيي في حكاية إقتحام البيت!

صحيت من النوم! على صوت عسافير! زقزقة عسافير قوية جداً! صوت ميتسمعش غير وقت! وقت الغروب!

كنت في حجرة نوم! نظرت حواليه! لكن معرفتش أنا فين! نزلت من البيت دا! دا بيت الشيخ سعيد

خرجت جري، لحد ما وصلت بيتي! لقيت لمة كتيرة جداً و أصوات بتتعالى

- إقتلوه

- إحنا هنبقى نرعاها!

- إنتا لازم تموت هنا!

- إحنا أحق بيها!

- هما مش هيسيبوكوا!

لحد ما دخلت وسط الزحمة!

لقيت كل أهل المنطقة محاطين زينب و الراعى! كان شكله شاب! في أواخر العشرينات، يعني حوالى ٣٠ سنة!

الراعى: إنتوا مش دخلتوا البيت؟ لقيتوا إيه؟! ولا حاجة، و لما عاصم يرجع هشتكي له اللي عملتوه مع ضيف ليكم!

- ... أهو عاصم رجع أهو!

الشيخ سعيد: بس يا عاصم يابني، إحنا و أهل المنطقة كلهم مش عايزين الراجل دا هنا! يا تمشيه! يا تتفضل معاه الراجل دا غريب! و شكله خاطف البنت اللي معاه دي!

أنا: يا ناس انتو مش فاهمين الراجل دا مهم قد إيه! الراجل دا راجل مبروك، أنا جيته هنا عشان يساعدي دا اللي هيخلصني من اللي بيحصل في البيت الشيخ سعيد: الله! يعني إنتا عارف اللي بيحصل! طب إسمع بقى يا سيدي! قدامك آخر اليوم دا! لو ممشيتش! إحنا اللي هنتصرف، ونمشيكوا! إحنا ناقصين عفاريت!

لقيت الراعى بيهمس!: عند المساء، ما ترون لا ما
تسمعون! و لدينا مزيد!

إلتفت له بتعجب! لكن مفكرتش في أي حاجة! إلا إنني
أفض اللمة دي! و قلت لهم خلاص! مش هنقعد هنا
للصبح! سيبوني أجهز نفسي، و مش هتشوفونا هنا!

و الناس مشيت، و الظاهر إن من اللمة دي كلها! حصل
حاجات فعلاً في غيابي!

دخلنا البيت، و رحبت بحفاوة بالراعى! لكن بدأت أسأله
بجدية عن اللي حصل في غيابي!

الراعى: متقلقش يا عاصم! إنتا في أمان! أوكد لك إنك
في أمان تام!

أنا: هو الكلام دا صح! كان في حاجات غريبة بتحصل
في البيت!!!

الراعى: ما هم دخلوا البيت كلهم! الولد دا اللي إسمه
عامر! جارك! دخل هو، و مصطفى، و خالد! التلاته
قالوا بنفسهم! إن مفيش حاجة في البيت، و رغم إنني
إتكلمت معاهم بكل ود! اللي إسمه عامر دا هددني و قالي
" أنا هكسرّك يا دجال إنت "

قالي الراعى إنه إحنا هنسافر من هنا مؤقتاً! و هنروح عند الدكتور عبد الله! بيحكي لي إن الرجل دا! هو اللي أنقذه، و هو اللي هيعرف ينقذني أنا كمان! فقررنا نجهز نفسنا عشان نسافر! و على الساعة ١٠ بالليل! بدأنا نسمع أصوات صريخ جامدة من الخارج! الرجالة قبل الستات كانوا بيصوتوا بكل قوة!

خرجنا لقينا، لقينا عامر قدام بيت عبد الصمد! عبد الصمد دا كان جارنا زمان! لكن إشتغل في الخليج من فترة كبيرة جداً! و البيت من ساعتها فاضي! محدش بيدخله!

لقينا عمار قدام الباب! و اضلاعه كلها مرمية جمب جتته! متكسرة!!

في وسط المشهد دا! لقيته ببيتسم بخفوت! مش عامر!!!!
الزاهد!!!

مركزتش و قلت لهم إسعاف بسرعة!!!! يلا!
لكن كلهم قالوا! مفيش فايده،، هو مات خلاص!
و لسا قبل ما نقول أي حاجة! سمعنا صوت من جوة!
صوت لحاجة بتتهبد في الأرض بشكل قوي جداً!،،

طلعت جري على فوق! في المطبخ! مكان كئيب جداً!
حتى لو معايا مليون كشاف نور! برضه المكان مظلم!
لقيت واحد عمال يجري يمينا، و شمال، و يئن! لقيته
خالد!!! كان بيجري زي المجنون حوالين المطبخ! و كل
شوية يقع و يقوم تاني! و عرفت سبب إنه بيقع كل شوية!
و سبب إنه بيئن مش بيصرخ! عينيه الإثنين و بوقه!
متخيطين! متخيطين بخيوط الغرز دي!! هتقول لي إزاي
يعني! هقول لك معرفش!! معرفش حصل إمتى و
إزاي!!! ،، و لسا هقول له أقف!!! لقيته إتزحلق! على
سيخ حديد إخرق مخه!!!!!!

عارفين يعني إيه أشوف صديق ليا بي موت بالطريقة
دي!!! شيلنا جتته وسط صراخ، و عويل، و بكاء!!!

و لسا بننزل! سمعنا صوت بيصرخ

-إبني .. إبني .. إحقوننا ..

بيت أم مصطفى! ربنا يستر ...

و جرينا دخلنا البيت!!! لقينا شاب ماسك سكينه!!! و ودنة
الشمال مش موجودة!!! إتقطعت!! و لقينا عمال يقطع في
ودنة اليمين!!! و كان بيضحك بهستيرية!!! متعرفش
ليه!!

عرفنا نوقفه، و وديناه بسرعة لأقرب مستشفى! و وسط
كل دا! بدور على الراعى!! ملقيتوش! جريت على بيتي!
لقيته هو و البننت اللي معاه! و بيقولوا ياللا بينا! إحنا
مستعدين!

أنا: ياللا بينا فين!!! إنتا إيه اللي إنتا عملته في
صاحبى؟؟؟ رد!!!!

الزاهد: أنا؟ إنتا فاهم غلط يا راعى! أنا معملتش حاجة!
هما اللي بيعملوا كل حاجة!!!
أنا: إيه!؟

الراعى: مراسم الصحوة بدأت!!! يا عاصف البؤساء!!!



الفصل الرابع

عرفنا نلحق مصطفى قبل ما يموت نفسه!!!
و من ساعت ما دخل المستشفى! ما بينطقش، لكن
ضحكات هستيرية تخرج منه بشكل غير طبيعي!
لكن في لحظة!! سكت!!!

و بدأ يردد الأرقام من واحد لخمسة! و يقول " إكس!"
بيقولها بسرعة رهيبه! تقدرنا تقولوا لسانه، و شفایفه أما
ينطقوا الأرقام و الكلمة دي! بيتحركوا أسرع من
الصوت! معرفناش اصلاً كان بيقول إيه غير لما فضلنا
نسمع حوالي نص ساعة!

غير إنه كان هينط من الشباك و ينتحر! لكن أخذ حقنة
تخدير، و إتخط في غرفة العزل!

فضلت قاعد معاه مستتية لحد ما يفوق!

لقيته قام، و بدأ يرجع للضحك تاني!

أنا: مصطفى! إهدا يا مصطفى!! مصطفى!!!!!!

مصطفى " هدوء تام "

أنا: مصطفى، شفت إيه فوق؟ أرجوك قل لي!

مصطفى: ههههه إنتا فاكِر إنه عايزني ههههه هو مش عايزني أنا!!! هو عايزك إنتا،

و بدأ يضحك ضحكات مش هستيرية! ضحكات مخيفة و مرعبة جداً!

مشيت من المشفى، و أنا مش فاهم قصده إيه! مين اللي عايزني؟ و عايزني ليه؟

إتجهت للبيت! عشان أنهي القصة دي كلها!!!

لقيت الراعى وزينب في البيت!!

أنا: أنا جبنتك هنا عشان غاية! و إنتا محقتش الغاية دي!

الراعى: واحدة واحدة عليا يا عاصم، إيه نبرة الغضب دي! دا أنا حتى بحبك جداً.

أنا: طب لو بتحبني ساعدني، ساعدني قبل ما حد تاني من أهلي يحصل له حاجة! أنا مش حمل إن حد تاني يموت!

الراعى: حاضر يا سيدي النهاردة كل شيء هينتهي!

خرجت من البيت عشان أجيب أي أكل، لأن البيت
مكش فيه حاجة! لقيت كل أهل المنطقة متجمهرين
حوالين البيت! و كلهم ماسكين سكاكين أو سواطير!!! أو
ناس فيهم ماسكة أسلحة!

و كلهم عايزين يقتلوه!! إنتوا عارفين من هو كويس!!
الزاهد

- لو مسبتتاش نجيب رقبتة! يبقى هنجيب رقبتك إنتا
كمان.

- من أول ما جه الملعون دا في المنطقة، والنحس مش
سايينا.

- ولادنا ماتوا من الساحر اللي عندك جوا، مش ماشيين
غير لما نموته

مادونيش فرصة حتى أتكلم، كلهم دخلوا و إقتحموا
البيت! و هدفهم واحد!

و أنا زي المتخشب! واقف مكاني!

لقيت ٥ دخلوا البيت و الباقي مستنيين جثة الزاهد!

دقيقة، الثانية، الثالثة!!

مفيش أي صوت!

لقيتهم كلهم!!! كلهم!!!!!! طلعا يجروا من البيت

بس مفيش على وجههم أي علامة للخوف!! بالعكس!

كانوا كأنهم متتومين!! كانوا بيجروا على بقيت البيوت!!

كل واحد كسر باب بيت و دخل!! أو إحنا كلنا واقفين مش

فاهمين حاجة!

بدون تفكير، و بكل تلقائية طلعت على البيت فوق اشوف

الراعى!! لقيت حجرتي مقفولة! فتحتها!

لاقينه جالس بكل هدوء! جالس جلسة حد! مستتي حاجة

تحدث!!!

و بدأت أسمع صوت عالي و صريخ من تحت!

نظرت من الشباك! وجدت ٣ بيوت بيتحرقوا، و توقعت

إن النار هتشب في الباقي!

أنا: إيه اللي حصل؟! إي اللي بيحصل دا!؟؟!

الراعى: يا ابني محدش عمل فيهم حاجة! هما اللي

بيعملوا كدا في نفسهم!

أنا: إنتا كداب! إنتا بتعمل حاجة!!! أنا جايبك هنا عشان إيه؟! مش عشان تخلصني ...

لقيته مسكني من إيدي و معاه البنت! و نزلنا من البيت، و بدأنا نجري، و المكان كله بيولع!! ،

بدأنا نتجه بعيد في أطراف المنطقة! لحد ما وصلنا لـ ، مقررش أقول عليه بيت! هو كان حاجة زي البيت!!

دخلنا جوا! لقيت آلة حديد كبيرة! و مولعة! دا، دا، دا فرن العيش!!!! إيه اللي جابنا هنا؟!!

دخلنا المكان دا! و بدأ يكلمني!!!

الراعى: مسألتش نفسك ليه إنت اللي إستلمت اللعنة، و بقيت معاك؟! ، مسألتش نفسك ليه ممتش لحد دلوقتي؟!!

- أنا برضو سألت نفسي أما قاسم مات! اللي كان معاه اللعنة قبلي عارف ليه أنا ممتش لحد دلوقتي?!!

لأني قبلت الكتاب!!!!!!!!!!!!!! و قبلت اللعنة!!

الراعى: نفس المشهد! و نفس التاريخ!! نفس الحدث بيتكرر! إحنا اللي بنصنع اللعنات! صاحبك اللي في

المشفى هرب منها! بعد ما قتل كل اللي فيها!!!

- أما تسمع عن أسطورة " أبو ودن مقطوعة " إعرف
إني أنا اللي عملتها!!!

و بدأ يضحك ضحكات ترج المكان كله! و لقيته ماشي
ناحية الفرن! و نزل على الأرض نزل و نام!!! في
تابوت حديد ضخمة!!!!!! لسا بقول له هتعمل إيه!

لقيت كائنات سودة بشعة! طلعت من الفرن، و هي
بتصرخ، و شالته! و ووضعت داخل الفرن المشتعل!
عشان يسبح، و يدوب، و يتبخر جوا التابوت!!!!

بدأ ينطق بكلام غريب قبل ما يدخل الفرن! كلام أنا
سمعته قبل كدا!

الراعى: خلي بالك من زينب! هتبقى أمانة في إيدك لمدة
٥ سنين! إرعاها يا عاصم البؤساء!

- سلامي للشيطان الأعظم!

٥ سنين؟! يعني إيه?!?! يعني أنا هعيش ٥ سنين بس!!

و إيه إكس دي?! يعني إيه؟

موساق!! فهمت!!!!

من واحد لخمسة!!!!!!

ق ا س و م!!!!!!!!!!!!!!!!!!!! حروفها ه حروف!!!

خذت البننت اللي معايا! و بدأت أجري من المكان! اللي بدأت تحصل فيه بالضبط نفس المأساه! بتاعت قرية الراعى!

و عرفت إني أنا الموكل باللعنة الجديدة! و مش عارف أعمل إيه!!!

أخذنا سيارة من النقل الكبيرة دي! و إدينا السائق مبلغ محترم! و إحنا مش عارفين رايحين على فين!!

السائق بدأ يمشي، و إحنا بنفكر هنعمل إيه!!

السائق: إلا قولي يا ذوق! لسا مش عارف هتروح على فين؟

أنا: لا! مش عارف أي حاجة!

السائق: سيبها على الله إنتا يا ذوق، و على العبد لله! أنا هشوف لك مكان تستريح فيه مؤقتاً! لحد ما تزبط أمورك! بس تكرمنا برضو!

أنا: حاضر!!!

السائق: استني بقي ، هشغل لك حاجة تهدي أعصابك!

و بدأ يشغل! سورة البقرة
أثناء ماهي شغاله! لقيت زينب! ماسكة دماغها! كأن في
صداع قاتل جواها!
قلت للسائق ، بعد إذتك وقف القرآن لحظة واحدة!
وقفه! لقيتها رجعت عادي جداً ساعتها بس!! خطرت في
بالي فكرة واحدة!
أنا: نزلنا يا أسطى نزلنا!!
السائق: خير بس يا باشا! فيه إيه؟
أنا: لازم نازل هنا!! نزلنا
السائق: ... خلاص أوامرك أباشا! أستناك طيب؟!
أنا: لا لا متشكر!
زينب: إحنا نزلنا هنا عليه!
أنا:

زينب:

مشينا خطوتين! لحد ما لقيت بيت من اللي بيبقى ع
الطوب الأبيض دا! اللي بيبقى موجود ع الطريق
الصحراوي!

قلت لها تستناني برة! كان الوقت خلاص وقت غروب!

أنا: زينب! تعالي!!!

و دخلت! لقيتني واقف قدامها! و حاطط ورا إيدي حاجة!
عرفت ساعتها أنا هعمل إيه

زينب: " بكل رعب " هتقتلني؟

أنا:

و مسكت حجر، و على دماغها! ،، لحد ما بدأت تنزف!
بدأت أحفر، و أحفر، و أحفر! لحد ما بقى فيه عمق
كويس، و حطيتها داخل الحفرة!!

أيوة بالظبط كدا!!!! هدفنها صاحية بقي و لا
ميتة!!! هدفنها!!

دي اللعنة الحقيقية!!! كانت مع قاسم! بعدها الراعى!
بعدها أنا! ليه كلنا بنموت و هي لا!

بدأت اردم من أول رجليها لحد ما وصلت خلاص
لراسها! و هي بتتردد في خفوت: غلط! مش أنا هوا! غلط

لحد ما جيت على آخر ردم! على وجهها و هي حية!

في لحظة! لقيت واحد بيتكلم!

الله أعلم ... يمكن تسمعوا قصتي في يوم من الأيام! يمكن
تطلع أسطورة جديدة جمب النداهة، و أبو رجلة
مسلوخة، و أبو " و دن مقطوعة "

ساعتها بس! إعرفوا إن أنا اللي عملتها!

فضلت أمشي و ألف في الطريق مش عارف أعمل إيه!!
لحد ما قررت إني هرجع البيت دا تاني! و أحاول أنقذها!
دا لو مكانتش ماتت خلاص!!

رجعت تاني لنفس الكوخ أو البيت دا! و رحنت لك،،!

للحفرة! لكن مفيش حد جوا ال الحفرة!!

البننت راحت فين؟

جريت من المكان، و أنا بصرخ من الرعب، و الفرع!
إزاي خرجت! مين خرجها؟!

بعد ما هديت شوية، و خدت نفسي! قررت إني هنسى
اللي شفته! و همسح كل ذاكرتي!! مش عايز منها و لا
من أي حد حاجة! أنا عايز أعيش عيشة طبيعية مش
أكثر!

خدت مواصلات! و عرفت طريقي! هروح على مرسى
مطروح أه!

صاحب قديم جداً لجدي الله يرحمه! هحاول أطلب منه
إنه يساعدي في السكن! و إني كمان ألاقي شغل!
و فعلاً وصلت هناك! و أخذت ترحيب حار جداً، و كان
الحوار كالتالي!

الحاج ابو عزام: أهلاً أهلاً بالغالي أبني الغالي!!!
- إزيك يا عاصم يابني!! إزي حالك كبرت يابني ما شاء
الله!

أنا: الله يبارك فيك يا حاج الحمد لله أنا كويس إزاي حالك
إنت.

الحاج ابو عزام: الحمد لله يا بني بخير بشوفتك!
و بدأت أكلمه عن مسألة سكني و شغلي!

و قابل الموضوع بحفاوة بالغة! و حلف عليا إني أسكن
معاه في بيته! لأنه عايش لوحده! لأن كل ولاده
متجوزين! و مراته الله يرحمها

لكن بسبب رفضي الشديد! لأنني بكره بشدة إني أكون
ضيف تقيل على حد! قرر إني هبات معاه اليومين دول!
لحد ما يجهز لي شقة في عمارة جمبهم!

و فعلاً ذا اللي حصل! أخذت شقة في عمارة مكونة من دورين! الظاهر إنها مش عمارة للإيجار! ذا بيت من دورين للحاج أبو عزام الله يبارك له يا رب!! سكنت في الدور الثاني! و كمان إشتغلت في المخبز بتاعة! فرن كبير جداً ما شاء الله.

يعني بإختصار الحياة رجعت زي ما كانت و أحسن كمان،

إشتغلت في مخبز كبير جداً ما شاء الله، و الحياة كانت حلوة جداً!!!

لحد ما شفنها!!!

بنت في الـ ١٤ أو الـ ١٥ من عمرها! بعين زرقا! و نفس الرقعة اللي على عنقها الشمال!! اللي أنا متأكد إنها عين حمرا زي الدم ورا الرقعة دي! و مش حمرا من قلة النوم! لونها الطبيعي أحمر!!!

بكل هدوء! إديتني حساب اللي إشتريته! و مشيت

مصدقتش اللي شفته، و فضلت أبص عليها مرة، و إثنين! لحد ما إتأكدت إنني مش بخرف! و فضلت أمشي وراها!

لقيتها وقفت.

زينب: إيه ،،، عايز تدفنني تاني؟

أنا:

و فضلت أمشي برضو وراها!

لحد ما وصلنا امام البحر

أنا: أنا والله مكنتش، مكنتش أعرف إن..

- أنا مكنش قصدي

زينب: (بكل غضب) مكنش قصدك إيه!!

لقيتها بتتجه ناحية الشط! لحد ما قعدت على الرمل، و

فضلت تبص للبحر ...

و أنا واقف جمبها مش عارف أقول إيه!

زينب: أنا هحكي لك قصتي! مش دا اللي إنتا عايز

تعرفه؟!!

أنا:

بتكمل و تحكي!

أنا إسمي زينب، و عمري ١٤ سنة | جدي إسمه قاسم!
قاسم آصف السماوي! من أكبر علماء الآثار في مصر!
دايما كان يقول إن الآثار مش الحاجات القديمة! الآثار
الحاجات النادرة، و إن لم تكن من الأجداد! | كان بيحبني
جدا! يمكن حتى أكثر من ابنه! زي ما بيقولوا!

أعز من الولد ولد الولد! و أنا مكنتش بحب شيء في
الدنيا أكثر من جدي! دايما كنا مع بعض! مكنتش عايزة
من الدنيا حاجة إلا إني أبقى معاه، حتى إني كنت بروح
معاه جولاته الإستكشافية! لحد ما جه اليوم اللي هيغير
حياتنا كلياً!! رحنا لمعبد إسمه معبد " الكاهن الكبير " و
كالعادة بدأت أتمشى في المكان الضخم دا! رغم تنبيه
جدي إني مبعدش عشان متهش!

و بدأت أمشي لحد ما إتكعبت في الأرض! لا مش في
الأرض في كتاب كان في الأرض!!

أظن مش لازم أوضح لك كتاب إيه دا! بدأت أبتسم و
قلت أنا لقيت لقية! هوديه لجدي بسرعة!

بكل براءة رحنت لجدي عشان أديه الكنز اللي لقيته! لكن
في الحقيقة أنا لقيت لعنة! لعنة شيطانية إزالتها شبه
مستحيلة!!!

رحت و إديته الكتاب! و بدأت الحياة الجديدة!
في البداية بدأت أحس بوجع شديد جداً في عيني الشمال!
اللي لاحظت إنها كل فترة لونها يتدرج من الأزرق
للأحمر! زي ما إنتا شفت!

و كل ما لونها يحمر أكثر! كل ما أشوفهم بوضوح! كلهم
قدامي، و جدي! جدي إنعزل عن الدنيا كلها! دايمآ في
بيته! محدش بيدخل له و لا هو بيخرج! بعدها بفترة!
أمي و أبويا ماتوا! عارف ماتوا إزاي كانوا بيشربوا
سائل ملوث!! كانوا بيشربوا دم!! دمهم

بعدها بقيت في عهده جدي! ،، اللي قرر إننا هنسافر من
مرسى مطروح! للصعيد! لقريّة معينة!!! أظن إنتا
عارفها كويس ...

بدأ جدي ينفذ تعليمات القاسوم بالنص! الكيان اللي
لابسني!

لكن جدي إشترط شرط عشان ينفذ كلام القاسوم! إنه
يسيبني أعيش!!!

و افق القاسوم! و بقيت مع الراعي!!!

أكثر إنسان حبيته بعد جدي! لدرجة إني سميته " أخويا
"، و عاملته أكثر من أخويا!

٩ سنين! لحد ١٤ سنة! فضل ير عاني! رغم إني سببت
له أشد أنواع العذاب!

كنت دائماً أصحيه من نومه! عشان يشوفني و أنا ماسكه
رأس أرنب دبخته! و دمه بيتساقط على الأرض!
أو أخضه و أنا بنادي عليه! عشان يشوفني و أنا واقفه
على سور البلكونه!!

لكن هو دائماً كان يعاملني أحسن معاملة! و فضل
يستحمل و يستحمل! لحد ما إنتهت مدته!

و جيت إنتا! جيت عشان تدفني قبل حتى ما تقضي معايا
يوم.

لكن بوجود القاسوم! نجوت من الموت المحتم! الدفن!!

بس تعرف! أنا مش زعلانه من اللي إنتا عملته! أنا
السبب! أستاهل و أكثر

و بدأت تبكي!!

أنا: أنا آسف، إنتي متستهليش حاجة! إنتي معملتيش
حاجة!!

زينب:

أنا: من هنا و رايح أنا مش هسيبك! أنا هر عاكي! زي
جدك! و زي الراعى و أكثر كمان!

زينب: لا! كدا كفاية!! مش هأذي حد تاني! أنا هبعد عنك
أنا زهقت من موت كل اللي حواليه!

بكل غضب! مسكتها من إيدها، و بدأنا نروح لشقتي!
بدون كلمة مني أو منها!

وصلنا! و وضحت لها إني، مستحيل أسيبها! خصوصاً
بعد اللي أنا سمعته! لأنني حسيت إني شيطان! لما عملت
فيها اللي عملته!

جهزت لها حجرة تنام فيها! و كمان أنا جهزت نفسي
عشان أنام! لأنني عديت بيوم متعب جداً! لسا هحط راسي
على المخدة.

سمعت صوت! صوت خبط على باب الحجرة!

أنا: أدخل!

:

أنا: أدخل!!!؟؟

في حالة من إنعدام التركيز! مش بفكر في أي حاجة! إلا
المصيبة اللي أنا فيها!

خلصت شغل! و رجعت البيت! لقيت لمة كبيرة! حوالين
العمارة، لأن في بنت في السطوح واقفة على سور
السماك بتاعه ميجيش ١٥ سم! في هوا ممكن يوقع
الخرانات من مكانها اصلاً!!!

جريت بدون تفكير على العمارة و طلعت السطح!

أنا: زينب ،، إنزلي ! إنزلي من عندك!

زينب:

بدأت أمشي بالراحة جداً ناحيتها! لحد ما مسكت إيدها،
و زقيتها عليا لقيتها فتحت عينها

زينب: إيه! في إيه؟! أنا فين؟؟؟

أنا:

اجلستها مع الحاج أبو عزام و أنا في قمة الحزن، و
الإنهيار!

رحت المسجد وسط بكاء شديد! و أنا عمال أدعي ربنا
إنه يساعدي!!

لحد ما لقيت راجل لابس جلابية بيضة! و مبتسم إبتسامة
هادئة جداً! و وشه يسر الناظرين!

لقيته بيقول لي مالك يابني؟!

حكيت له قصتي من الـ أ لـ لـ ي

لقيته إداني حاجة زي سلسلة! أو سلسلة فعلاً! قال لي إني
أديها للبنت!

رجعت البيت، و قال لي الحاج أبو عزام! إن زينب
رجعت العمارة تاني!

رحت لهنالك! و أنا مش فاهم ليه إداني السلسلة دي
اصلاً؟! كان شكلها غريب! كانت على شكل مربع!

رجعت البيت! لقيتها نائمة، كانت حاطة دماغها على
السفرة! و كانت سائدة على شوية ورق! بصيت عليه،
لقيته مليون مثلثات، و أسهم! عرفت إنه كان موجود!
مش هي اللي رسمتهم!

عالت السلسلة حوالين رقبتها! و حاولت أصحياها، لكن
كانت في حالة تامة من النوم!

فى وديتها لأوضتها! و رجعت أنا كمان لأوضتي لكن
بعد دقائق بدأت أسمع أصوات من أوضتها أصوات حد

زينب: أنا آسفة، أنا اللي غلطانة!! بس تعرف كان نفسي
أفضل معاك!

أنا:

لقيتها جريت عليا مرة واحدة بسرعة شديدة! و زقتني
من الشباك!

آخر مشهد شفته قبل ما أغمض عيني! مشهد عمري ما
هنساه! أو صورة بمعنى أصح!

صورتها و هي بتبكي، و بتبتسم في نفس الوقت!

المبنى من برا كان كله بيتحرق! و الناس كانت بتبص
عليا

و أصوات تتهامس

- يا ساتر يا رب، إيه الحريق دا كله!- إسعاف بسرعة!
الولد لسا بيتنفس!- البنت دي هتقع!

- بيقولوا إنه نط!

- طب إحقوها بسرعة قبل ما تتحرق!

إنتهت الحكاية!!! إنتهت اللعنة! إنتهت حياتي! إنتهى كل
شيء...

لكن دا!!! دا اللي إنتوا متصورينه!
آخر صورة متذكرها! بنت رمتني من عمارة، و فضلت
تبص لي و تبكي!
فتحت عيني! عشان ألاقي نفسي في أوضة بيضة!! كلها
أبيض في أبيض .
عرفت من شكل السرير و المكان! إنها المستشفى
لكن قبل ما أدرك كل دا! كنت حاسس بحرارة دافئة في
إيدي الشمال!
لقيت حد ماسك إيدي بقوة شديدة!!
كانت هية بنت ذات شعر بني، و لون أبيض زي الثلج!
كانت قاعدة على كرسي! و حاطه خدها على طرف
السرير اللي أنا نايم عليه! و متمسكة بإيدي بشكل كبير!!
صحيتها بهدوء شديد! عشان تبص لي أقل ما يقال عنها!
أنها حوراء زي اللي بنسمع عنهم في قصص ما قبل
النوم! لكن المرة دي! عينيها الاتنين كانوا زرق!!
دخل الدكتور! و قال لي! إني نجيت بأعجوبة! لولا إني
وقعت على عربية بتنقل أثاث! كان زماني ميت!!
و سألني!

الدكتور: ألا قولني يا بني! مين دي؟!
بكل تلقائية، و بابتسامة هادئة جاوبته! أختي!!!
قمت من السرير، و كلي فرح، و سعادة بالغة! بصيت
من الشباك!
لقيته كان الراجل اللي قابلته في المسجد! ابتسم لي، و
شاور لي بالسلامة! و مشي في هدوء ...
تعرفوا! أنا مش عايز أعرف مين دا! و عرف إن
السلسلة دي هتساعدني إزاي! أنا كل اللي عايزة إنني
أعيش في هدوء! و أرعى البنت اللي أنقذتني!

" تمت بحمد الله "

سيرة ذاتية

الكاتب: إيهاب محمد همام عبد الرحمن
اسم الشهرة / إيهاب همام.

الصفة الأدبية: كاتب رواية و قصص قصيرة
وخواطر

- عضو مجلس إدارة نادي أدب قصر ثقافة مغاغة
بالمنيا

- عضو نادي القصة بالقاهرة

- محرر صحفى بمجلة البديع العربي الثقافية
الورقية.

- عضو في دليل المبدعين العرب والاتحاد الدولي
العربي للأدباء والمثقفين ورابطة الشعراء والأدباء
وغيرها من الكيانات الأدبية والثقافية.

صدر للكاتب:

- فم الأفاعي " رواية "
- عن دار البديع العربي للطباعة والنشر
- لقاء مع الشيطان " رواية "
- عن دار البديع العربي للطباعة والنشر
- العميل ١٠١ " رواية "
- عن دار البديع العربي للطباعة والنشر
- أصابع الشيطان " مجموعة قصصية "
- عن دار ديوان العرب للنشر والتوزيع عام ٢٠٢٠.
- عودة العقرب (رواية)
- عن دار ابهار للنشر والتوزيع عام ٢٠٢١
- الممر الخارجي (رواية)
- عن دار الولاء للنشر والتوزيع عام ٢٠٢١.

- همزات الشياطين (رواية)
- عن دار ميم للنشر والتوزيع عام ٢٠٢١.
- ملوك على عرش الفن (سير ذاتية)
- الجزء الأول والثاني عن دار ديوان العرب للنشر والتوزيع عام ٢٠٢٠
- أوراق قديمة (قصص قصيرة جدا)
- عن دار اقتباس للنشر الحديث ٢٠٢١
- بعد منتصف الليل (رواية)
- عن دار المصرية السودانية الإماراتية ٢٠٢٠
- مشاركة في كتاب القصة القصيرة من المنيا
- حصل على لقب أديب النيل والفرات
- حصل على وسام التمييز والإبداع

- حصل على العديد من شهادات التقدير والمراكز الأولى من عدد من المنتديات والمجلات الأدبية والالكترونية.
 - نشرت لي عدد من القصائد والقصص في الكثير من المجلات الأدبية الورقية والالكترونية منها المساء والمساء العربي والجمهورية وغيرها.
 - شارك في العديد من المؤتمرات والفاعليات الأدبية والثقافية لعدة سنوات.
- رابط صفحة الفيس

<https://www.facebook.com/profile.php?id=mibextid=ZbWKwL&١٠٠٠٢٠٨١٥٧٤٥٥٦٢>

الايمل ٢٩aheryf@gmail.com

ت/٠١٠٠٩٠١٥٥٧٥

المحتويات

٣	الإهداء
٤	مقدمة
٦	الفصل الاول
٢٢	الفصل الثاني
٣٩	الفصل الثالث
٥١	الفصل الرابع
٧٦	سيرة ذاتية

فنه قصص الرعب يتجلى الجو
قاتما ذو لون ازرق يتشكل أمامنا
ككيان مُعادى نرفضه ونرفض
تماماً الحيش فيه بل وربما نرفض
الحديث عنه إما باعتباره شيئاً منفراً
غير مقبول وإما باعتباره مرتعاً خصباً
للخيال والتخاريف وقد يجده
البحض مشوقاً مثيراً للاهتمام

ايحاب همام



002 - 01061635162
002 - 01503570075
ranyhmtwlyblat@gmail.com

تصميم منة شومان